

KEMUDAHAN PEMERIKSAAN KESIHATAN ATAS ASAS KEPERLUAN PERKHIDMATAN

TUJUAN

1. Ceraian ini bertujuan untuk menjelaskan pelaksanaan kemudahan pemeriksaan kesihatan atas asas keperluan perkhidmatan kepada pegawai.

LATAR BELAKANG

2. Kemudahan Pemeriksaan Kesihatan bagi pegawai telah dilaksanakan melalui Perintah Am 29, Bab F Tahun 1974 yang memperuntukkan pemeriksaan kesihatan percuma bagi pegawai seperti yang berikut:

- i) pegawai yang berjaya mendapat jawatan dalam sebarang perkhidmatan Kerajaan yang dikehendaki menjalani pemeriksaan kesihatan; dan
- ii) pegawai yang dipilih untuk menghadiri kursus yang diluluskan oleh Kerajaan yang disyaratkan untuk menjalani pemeriksaan kesihatan.

3. Selain daripada itu, Kerajaan melalui Pekeliling Perkhidmatan Sumber Manusia (PPSM), Ceraian SR.2.5.1 menetapkan supaya pegawai digalakkan menjalani pemeriksaan kesihatan sekurang-kurangnya sekali setahun bagi pelaksanaan Saringan Kesihatan Kendiri (SKK). Pada masa yang sama, Kerajaan telah menetapkan pegawai yang berumur 40 tahun dan ke atas adalah digalakkan menjalani Pemeriksaan Kesihatan Komprehensif (PKK) dari semasa ke semasa. Dalam hal ini, SKK dan PKK tersebut tidak dikenakan sebarang bayaran sekiranya pegawai menjalani pemeriksaan di fasiliti kesihatan Kerajaan.

Namun begitu, SKK dan PKK yang dilaksanakan di fasiliti/premis kesihatan swasta adalah atas tanggungan pegawai sendiri.

4. Selaras dengan hasrat untuk memastikan tahap kesihatan pegawai berada pada tahap yang terbaik untuk menjamin keberkesanan pelaksanaan tugas, Kerajaan melalui Pekeliling Perkhidmatan Bilangan 1 Tahun 2024 - Pelaksanaan Sistem Saraan Perkhidmatan Awam (SSPA) Bagi Pegawai Perkhidmatan Awam Persekutuan bersetuju untuk menambah baik pelaksanaan kemudahan pemeriksaan kesihatan dengan memanjangkan kemudahan ini kepada pegawai yang diarahkan oleh Ketua Jabatan untuk menjalani pemeriksaan kesihatan atas keperluan perkhidmatan sama ada bagi keperluan statutori atau keperluan organisasi.

PELAKSANAAN

Tafsiran

5. Dalam Ceraian ini, melainkan jika konteksnya menghendaki makna yang lain:
- i) **“fasiliti kesihatan Kerajaan”** bermaksud sebarang hospital Kerajaan dan termasuk mana-mana hospital universiti, hospital tentera, rumah sakit angkatan tentera, klinik-klinik Kerajaan dan lain-lain yayasan perubatan Persekutuan.
 - ii) **“fasiliti kesihatan swasta”** bermaksud mana-mana klinik/hospital swasta yang berdaftar dengan Kementerian Kesihatan Malaysia (KKM).

Kelayakan

6. Kemudahan Pemeriksaan Kesihatan Atas Asas Keperluan Perkhidmatan layak diperuntukkan kepada:

- i) pegawai yang dilantik secara tetap, sementara atau kontrak (*contract of service*); dan
- ii) pegawai terlibat dengan tugas yang menetapkan syarat pemeriksaan kesihatan untuk melakukan tugas.

Syarat-syarat

7. Pegawai layak diberikan kemudahan pemeriksaan kesihatan atas asas keperluan perkhidmatan tertakluk kepada syarat-syarat berikut:

- i) terhad kepada diri pegawai sahaja;
- ii) keperluan menjalani pemeriksaan kesihatan adalah disebabkan keperluan perkhidmatan/keperluan melaksanakan tugas seperti yang ditetapkan oleh mana-mana akta/peraturan berkuat kuasa yang secara khusus mensyaratkan pemeriksaan kesihatan untuk melaksanakan tugas rasmi pegawai;
- iii) sekiranya keperluan pemeriksaan kesihatan tersebut tidak dinyatakan dalam mana-mana akta/peraturan yang berkuat kuasa, tetapi Ketua Jabatan mendapati bahawa terdapat keperluan organisasi, maka Ketua Jabatan hendaklah mendapatkan perakuan Ketua Perkhidmatan;

- iv) Ketua Jabatan memberikan arahan kepada pegawai untuk menjalani pemeriksaan kesihatan;
- v) pegawai hendaklah menjalani pemeriksaan kesihatan di fasiliti kesihatan Kerajaan;
- vi) sekiranya kemudahan pemeriksaan kesihatan yang diperlukan tidak dapat diperoleh di fasiliti kesihatan Kerajaan, kemudahan tersebut boleh diperoleh di fasiliti kesihatan swasta atas tanggungan Kerajaan tertakluk kepada pematuhan terhadap syarat-syarat berikut:
 - a) mengemukakan permohonan tuntutan perbelanjaan kepada Ketua Jabatan menggunakan Borang Perubatan 1/09 seperti di Lampiran SR.2.1.1(J);
 - b) Ketua Jabatan boleh membuat pertimbangan untuk meluluskan permohonan pegawai berdasarkan peraturan-peraturan berkuat kuasa; dan
 - c) kadar tuntutan adalah berdasarkan kadar sebenar bagi pemeriksaan kesihatan atas asas keperluan perkhidmatan sahaja. Sekiranya pegawai menjalani pemeriksaan kesihatan bukan atas asas keperluan perkhidmatan, maka kos tersebut hendaklah ditanggung sendiri oleh pegawai.

Tanggungjawab Ketua Jabatan

8. Ketua Jabatan bertanggungjawab untuk memastikan perkara-perkara berikut dilaksanakan dengan teratur:

- i) syarat-syarat pelaksanaan sebagaimana yang ditetapkan dalam Ceraian ini dipatuhi;
- ii) memastikan keperluan pemeriksaan kesihatan pegawai bukanlah kehendak pegawai sebaliknya keperluan tersebut termaktub dalam mana-mana akta/ peraturan berkuat kuasa (keperluan statutori) atau keperluan tersebut adalah keperluan organisasi;
- iii) sekiranya keperluan pemeriksaan kesihatan tersebut merupakan keperluan organisasi, Ketua Jabatan hendaklah mendapatkan perakuan Ketua Perkhidmatan setelah mendapatkan sokongan daripada Bahagian Perkembangan Kesihatan Awam, Kementerian Kesihatan Malaysia berhubung keperluan pemeriksaan kesihatan;
- iv) mengemukakan arahan secara bertulis kepada pegawai untuk menjalani pemeriksaan kesihatan di fasiliti kesihatan Kerajaan; dan
- v) bagi urusan permohonan perbelanjaan sekiranya kemudahan pemeriksaan kesihatan tidak dapat diperoleh di fasiliti kesihatan Kerajaan, pembayaran yang dibuat kepada pemohon adalah berdasarkan kepada tatacara dan peraturan kewangan berkuat kuasa.

TARIKH KUAT KUASA

9. Ceraian ini berkuat kuasa mulai 1 Disember 2024.

PEMAKAIAN

10. Tertakluk kepada penerimaannya oleh pihak berkuasa masing-masing, Ceraian ini pada keseluruhannya dipanjangkan kepada semua Perkhidmatan Awam Negeri, Pihak Berkuasa Berkanun dan Pihak Berkuasa Tempatan.

**KETUA PENGARAH PERKHIDMATAN AWAM
JABATAN PERKHIDMATAN AWAM
MALAYSIA**